

COMUNICATO n. 3528 del 24/11/2025

Men mu' se innschraim va de 27 van òlderhaileng finz as de 09 van genner 2025

Schualjor en auslònt en de Europäische Union ont en Regno Unito: s sai' u'ganommen kemmen de kriteri ver de voucher

[Mòcheno] De Provinzaljunta, pet a mossnemm vourstellt van vicepresidente Achille Spinelli ont van assessor Francesca Gerosa, hòt u'ganommen de Nochrìcht ver za gem der voucher ver za learnen en auslònt en de Europäische Union ont en Regno Unito. S ist a naieket ver de studentn van dritte jor va de zboate schual va zboate grad, oder van zboate jor van zboategen learinstitutn va zboate grad va viar jor, as billn gea' auslònt ver secks mu'netn oder ver a schualjor.

“Der inser zil ist der sèll za gem de moglechkait en de studentn za hom a schualu'lear en auslònt - unterstraicht der assessor Gerosa - bichte ver za bòcksn ont learnen de sprochen. Pet de doi hilf ber billn understitzn s learnen auslònt as parootet de jungen za hom an internazional aussicht”.

“Tschbinnen en bissn, verpersern s kennen de sprochen ont de jungen durch an inklusiv ont nain vurm, stellt vour an nain toal ver za gem gilt en mentsch ont en de òrbetn guat za verpersern der gònze kultural ont sozial ont produktiv sistem Trentin”: sok nou der vicepresidente Spinelli.

De naieket geat no en de provinzal Strategi, en ganau pet en zil va mittler ont longa zait ver en versterchern s bissn van u'lear va mearer sprochen ver de studentn ont studenten van an iata schual, gabiss as s understitzn ont s giltn va de kultural birtshòft ont social identitat van Trentin geat turch aa en vergreasern s bissn ont s kennen klòffen en an europeischen ont va de bèlt livell. Der projekt hòt der zil aa za gem de moglechkait za uterstitzn de lear roasn en auslònt as bichte sai' ver za bòcksn sèlber ont ver za vergreasern s bissn ver za meing vinnen òrbet.

BER MU' TOALNEMMEN

S meing toalnemmen en de doi naiòrbet de studentn as:

- sai' noch za mòchen en schualjor 2025/2026 s zboate jor va de zaboateschual va zboate grad va viar jor oder s dritte jor va de schoateschual va zboate grad en balscha schualn;
- hom nèt mear va zboa'sk jor en lest to as men mu' vourstelln de vrog;
- lem en de Provinz va Trea't;
- plaim en Provinz va Trea't (der student miast learnen en a schual en Trentin);
- as mòchen toal van a familia as hòt an indicator ICEF “familia” as kimmip auser va de staisersog ont van pahalter 2024, zeilt no de 15 van lestages 2025, gleich oder minder va 0,83.

BOU

Jorschual en a Lònt va de Eurpeische Union oder van Regno Unito.

TAUERN ZAITN

S tauern va de schualzait mu' bern a jor (nèt minder as 240 ta) oder ver minder zait (mindestn 110 ta).

VOURSTELLN DE VROGN

De vrog ver en studiumprais muast sai' vourstellt, lai' online, va um 10.00 van pfinsta as de 27 van òlderhaileng 2025 finz um 12.30 van vrai'ta as de 09 van genner 2026, direkt asn sito <http://www.provincia.tn.it/fse>.

S gèlt as bart sai' zuatoalt bart kemmen gem lai benn as ist garift schualjor 2025/2026 a'ne schualmengeln. S gèlt as men gip hòt der rif za hèlven za zoln de kostn van lem bail as der student geat en auslònt za learnen, ober de organisazion va de u'lear kimmip galòk en student ont en de familia. S gèlt as bart kemmen gem bart bècksln noch en Lònt tschèrlt, noch en bern (s gònz jor oder a kirzera zait) ont en indicator ICEF "Familia".

De Nochrìcht ver za learnen en auslònt en de Europeische Union oder en Regno Unito, s keart en Programm FSE+ 2021-2027 va de Autonome Provinz va Trea't, en zòmm zuagèlt ver en 40 pro zent va de Europeische Union/ social Fondo europeische plus, ver en 42 pro zent van Stòtt ont ver sèll as vonzt 18 pro zent va de Autonome Provinz va Trea't.

S gèlt en gònzn sem galeik ist va 600.000,00 euro as bart meing zoln laischiar vinvasesk voucher.

Ver informazonen u men u'riaven:

Struttura Multifunzionale Territoriale Ad Personam

Via Pranzelores, 69 – 38121 Trea't

Van ma'ta finz en vraità va um 8.30 – 17.30

grea'nummer: 800 163 870 – fax 0461 390707

sait web: www.provincia.tn.it/fse+

Ibersetz gamòcht van Sprochtirl va de Tolgamoaschòft Hoa Valzegu' ont Bersntol

(cdt)